

16/09/1998

Malaysia bertuah dianugerahi pemimpin berwibawa

Amran Rahman

SAYA ingin mengemukakan sedikit pandangan berhubung isu semasa yang sedang diperkatakan mengenai pemecatan Datuk Seri Anwar Ibrahim daripada jawatan yang disandangnya dalam kerajaan dan parti.

Sebagai individu Islam atau organisasi berlambangkan Islam seharusnya kita tidak gopoh dalam membuat kenyataan atau mengambil sebarang tindakan.

Keislaman tulen akan memperlihatkan kita sentiasa dalam keadaan tenang dan berkeupayaan untuk mengawal serta mententeramkan diri dalam apa jua keadaan sama ada ketika senang atau dilanda kesusahan.

Perbezaan pandangan dan pendapat sesuatu yang tidak boleh dielakkan tetapi kita perlu mengarahkan perbezaan itu kepada sesuatu yang boleh menguntungkan atau memberi manfaat kepada masyarakat.

Kita mesti insaf mengenai fungsi, tanggungjawab dan amanah yang kita pikul.

Begitulah kita mesti cuba memahami dan menyelami fungsi, tanggungjawab dan amanah yang dipikul orang lain.

Apa yang jelas ialah kita semua mempunyai fungsi, tanggungjawab dan amanah yang berbeza.

Kita mungkin seorang bapa yang bertanggungjawab kepada keluarga atau penghulu yang bertanggungjawab kepada kampung. Ataupun ketua jajahan yang bertanggungjawab kepada daerah, ketua jabatan yang bertanggungjawab kepada jabatan atau pengurus bank yang bertanggungjawab kepada bank.

Semuanya adalah fungsi, tanggungjawab dan amanah yang terpikul secara khusus kepada seseorang.

Untuk negara kita yang dicintai ini, pada hari ini fungsi, tanggungjawab dan amanah secara khususnya terpikul di atas bahu Datuk Seri Dr Mahathir Mohamad selaku Perdana Menteri dan sekali gus Presiden Umno.

Ramai orang boleh bercakap sewenang-wenangnya dan kelihatan sebagai pejuang atau jaguh pembela bangsa kerana mereka tidak memegang fungsi, tanggungjawab dan amanah secara khusus kepada negara dan parti Umno.

Dengan fungsi, tanggungjawab dan amanah yang terpikul khusus seorang pemimpin sejati dalam membuat satu-satu keputusan, beliau akan memutuskan sesuatu yang terbaik untuk agama, bangsa dan negara.

Persoalan sama ada keputusan itu diterima atau ditolak tidak akan ada dalam agenda perjuangan pemimpin tulen seperti Dr Mahathir.

Seorang manusia tidak akan mengizinkan anggota badannya dipisahkan. Tetapi pesakit kencing manis terpaksa membuat keputusan untuk memotong mana-mana anggota badan demi menyelamatkan nyawanya.

Kalau ditanya apakah pesakit itu suka dengan keputusannya itu, sudah tentu jawapannya tidak.

Dalam konteks apa yang terjadi kepada Anwar, Dr Mahathir bertindak berdasarkan lunas peraturan dan undang-undang sedia wujud sekian lama.

Kuasa melantik atau melucutkan jawatan sesiapa pun adalah tindakan yang berhak dilakukan oleh beliau.

Janganlah segelintir kita hanya pandai menyetujui dan memuji apabila sesuatu pelantikan dibuat sebaliknya mereka membantah dan mencerca apabila pelucutan jawatan terpaksa dilakukan.

Nasihat ikhlas saya kepada Anwar, bercakaplah, bertindaklah selepas rasa kemarahan (api) terpadam dalam diri. Janganlah mudah untuk menyalahkan orang lain atas kelemahan diri sendiri.

Kepada Anwar, insafilah, sedarilah, orang yang sedang mengerumuni beliau bukanlah penawar (air) tetapi racun (minyak) yang akan menyebabkannya

terus terbakar malah rentung sehingga bangsa tidak akan mengenali Anwar lagi.

Kepada rakyat Malaysia, marilah kita tingkatkan sokongan kepada kerajaan untuk mengatasi masalah kegawatan ekonomi.

Berilah sokongan padu kepada negara dalam menjayakan KL '98, sukan kedua terbesar di dunia.

Negara kita adalah negara pertama di Asia yang diberikan kepercayaan menganjurkannya.

Sebagai rakyat Malaysia seharusnya kita berbangga dengan penghormatan ini.

Kepada individu yang menganggap diri mereka pemimpin mana-mana pertubuhan yang sengaja tidak dapat menerima apa yang berlaku ini sebagai ketentuan daripada Allah, usahlah kita layani mereka.

Serahlah kepada pihak berkuasa untuk menanganinya. Jika mereka berwibawa, tentu mudah bagi Dr Mahathir mencari ganti seorang pemimpin bagi mengisi kekosongan yang wujud sekarang ini.

Kita janganlah hanya pandai berbangga dengan kemajuan fizikal yang dicapai negara tetapi gagal untuk mensyukuri kehadiran seorang pemimpin yang dianugerahi sifat kepemimpinan yang begitu unggul serta pandangan yang begitu tajam oleh Allah.

Bangkitlah rakyat Malaysia, berganding bahu lah kita kepada usaha yang memberi manfaat kepada bangsa dan negara.

Doakanlah kesejahteraan Dr Mahathir dan keluarganya. Berilah peluang dan tingkatkan sokongan kepada beliau untuk melaksanakan amanah dirinya kepada agama, bangsa dan negara.